

FEDERALNI ZAVOD ZA STATISTIKU

PRIRODNO-MATEMATIČKI FAKULTET SARAJEVO

MEMORANDUM O SARADNJI

Septembar, 2019. godine

Na osnovu člana 32. Zakona o statistici u Federaciji BiH („Službene novine Federacije BiH“, broj 63/03 i 9/09), Federalni zavod za statistiku i Prirodno-matematički fakultet Sarajevo, uvažavajući praksu drugih statističkih institucija, a imajući u vidu zajedničke naučno-istraživačke i stručne interese, su saglasni da svoju komunikaciju i saradnju urede ovim Memorandumom o saradnji (u daljem tekstu: Memorandum)

PROTOKOL O SARADNJI

Član 1.

Federalni za statistiku i Prirodno-matematički fakultet Sarajevo su saglasni da, u skladu sa svojim interesima i potrebama, a u cilju razvoja svojih osnovnih djelatnosti, uspostave čvršću međusobnu saradnju u svim oblastima i na svim poslovima u kojima zajednički nastup i partnerski odnos donosi obostranu korist. Saradnje će se posebno odvijati kroz slijedeće aktivnosti:

- razmjena naučnog, stručnog i obrazovnog kadra i drugih saradnika;
- realizacija dodiplomskih, diplomskih i doktorskih studijskih programa i drugih programa kontinuirane edukacije;
- saradnja u oblasti istraživanja i realizaciji međunarodnih projekata;
- razmjena naučnih i stručnih iskustava i dostignuća;
- organizovanje studentske prakse za studente Odsjeka za geografiju;
- organizovanje stručno-edukativnih seminara i radionica i
- razmjena publikacija i stručne literature.

Član 2.

Konkretizacija aktivnosti navedenih u članu 1. će se odvijati zaključivanjem zasebnih ugovora kojima će rukovodstva Potpisnika precizno definisati poslove, prava i obaveze, a posebno eventualne finansijske obaveze vezane uz realizaciju ugovorenih aktivnosti.

Za svako ustupanje statističkih mikropodataka od strane Federalnog zavoda za statistiku, poštivat će se Procedura dobijanja mikropodataka.

Federalni zavod za statistiku će na osnovu pisanog zahtjeva, davati individualne podatke, bez da se iz tih podataka može direktno ili indirektno prepoznati individualna izvještajna jedinica, a u svrhu obavljanja naučno-istraživačke djelatnosti.

O korištenju predmetnih statističkih podataka sklapa se poseban ugovor na osnovu kojeg se korisnik obavezuje, pod materijalnom i krivičnom odgovornošću, da će statističke podatke koristiti samo u svrhu koja je navedena u zahtjevu, da ih neće davati na uvid i korištenje neovlaštenim licima te da će ih nakon upotrebe uništiti.

Član 3.

Potpisnici su saglasni oko posebnog interesa Prirodno - matematičkog fakulteta u Sarajevu da se za potrebe istraživanja svojih studenata, nastavnika i istraživača povremeno obezbijede statistički podaci koje Federalni zavod za statistiku na mjesečnom, godišnjem i višegodišnjem nivou vodi u svojim biltenima. U tom pogledu, Federalni zavod za statistiku će, na obrazložen i preciziran zahtjev Prirodno - matematičkog fakulteta u Sarajevu potpisan od strane njegovog dekana, bez finansijske naknade obezbijediti tražene podatke ukoliko sa njima raspolaže.

Prirodno - matematički fakultet u Sarajevu obavezan je Federalnom zavodu za statistiku dostaviti jedan uvezan primjerak naučno-istraživačkog rada, stručnog rada, završnog bachelor rada, magistarskog rada ili doktorske disertacije u kojima su korišteni podaci obezbijeđeni od strane Federalnog zavoda za statistiku u periodu ne dužem od 30 dana od dana objavljivanja rada, odnosno odbrane bachelor, magistarske ili doktorske teze.

Član 4.

Statistički podaci koji se na zahtjev Prirodno -matematičkog fakulteta u Sarajevu izdaju od strane Federalnog zavoda za statistiku, ne smiju biti zloupotrijebljeni, odnosno mogu se koristiti samo uz obavezno prethodno navođenje izvora podataka.

Član 5.

Prirodno - matematički fakultet u Sarajevu će pod posebnim uslovima omogućiti stručno usavršavanje na master, doktorskim i specijalističkim studijama kao i učešće na stručnim savjetovanjima i radionicama, čime će dati doprinos stručnom usavršavanju kadrova Federalnog zavoda za statistiku.

Član 6.

U cilju dogovorene promocije osnovne djelatnosti Federalnog zavoda za statistiku, studentima i uposlenicima, Prirodno - matematički fakultet u Sarajevu će po potrebi osigurati prostorne i tehničke uslove za tematske ili druge prezentacije Federalnog zavoda za statistiku u terminu koji će biti međusobno usaglašen.

Član 7.

Ovaj Memorandum je nakon potpisivanja na snazi sve dok jedan od Potpisnika ne zatraži promjene ili raskid Memoranduma. Prestanak važenja Memoranduma ne predstavlja prepreku za završetak početih zajedničkih aktivnosti, osim u slučaju da to Potpisnici drugačije ugovore.

Član 8.

Ovaj Memorandum stupa na snagu kada ga potpišu ovlašteni predstavnici oba Potpisnika.

Član 9.


Ovaj Memorandum sačinjen je u četiri istovjetna primjerka, a svaki Potpisnik zadržava po dva primjerka.

Potpisnici:



Prof.dr. Mustafa Memić
Dekan

Prirodno-matematički fakultet u Sarajevu



Doc.dr. Emir Kremić
Direktor

Federalni zavod za statistiku

Broj: 01601-2219/11-2019

Datum: 17-09-2019

Broj: 01-05.1-907/19

Datum: 12 SEP 2019